



**JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU**

***Sumáriu Kazu
Tribunál Distritál Baucau
Agostu 2014***

**Sumáriu prosesu julgamentu kazu iha Tribunál Distritál Baucau-
Periódú Agostu 2014**

Introdusaun

Iha Agostu 2014, JSMP liuhosi Legál Research Unit (LRU), kontinua hala'ó atividade monitorizasaun iha Tribunál Distritál Baucau no monitoriza kazu hamutuk 26 hosi total kazu 35 ne'ebe julga iha tribunál refere depoisde fila fali hosi feriadu judisiál hosi 01 Agostu to'ó 15 Agostu 2014.

Kazu 26 ne'ebé JSMP monitoriza involve ofensa ba integridade fízika simples ho natureza violénsia doméstika 17, ofensa simples ba integridade fízika simples 3, danu agravadu 1, omisídiu negligente 1, krime haosoru flora no fauna 1, omisidiu agravadu ho natureza violénsia doméstika 1, violasaun seksuál 1 no danu simples 1

Hosi kazu hirak ne'ebé JSMP monitoriza iha 17 mak tribunál konklui ona nia prosesu no kazu 8 mak sei kontinua nia prosesu.

JSMP observa katak kazu ho natureza violénsia doméstika kontinua sas iha tribunál sira, hanesan iha tribunál Baucau. JSMP konsege monitoriza kazu ho natureza violénsia doméstika 17 hosi kazu 26 ne'ebé Tribunál Baucau julga.

Tuir mai deskrisaun sumáriu kazu kompletu :

1. Kazu krime ofensa ba integridade fízika simples ho natureza violénsia doméstika – Núc. 0042/14.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena pena prizaun fulan 6 suspende tinan 1

Iha 18 Agostu 2014, Tribunál Distritál Baucau prezide julgamentu leitura sentensa no kondena arguidu DH ho pena prizaun fulan 6 suspende ba tinan 1. Tribunál prova katak arguidu komete

krime ofensa ba integridade fízika simples hasoru feen, iha 23 Dezembru 2013, iha Ossu, Distritu Viqueque.

Tribunál prova katak iha 23 Dezembru 2013, maizumenus iha oras 07:30 dader, arguidu no lezada diskuti malu kona-ba karau ne'ebé estraga sira nia toos. Tribunál mós prova katak arguidu foti aiteka nia rohan no baku iha lezada nia rentos to'o no hetan kanek.

Antes ne'e, ministériu públiku akuza katak iha 23 Dezembru 2013 maizumenus iha oras tuku 07:30 dader, arguidu ho lezada diskuti malu kona-ba karau ne'ebé estraga sira nia toos. Iha momentu ne'eba lezada koalia la para tanba ne'e arguidu nervozu hodi foti ai ida baku iha lezada nia rein toos no rezulta lezada hetan kanek.

2. Kazu krime ofensa ba integridade fízika simples ho natureza violénsia doméstika – Núc. 0477/13.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena ho pena prizaun fulan 6 suspende tinan 1

Iha 18 Agostu 2014, Tribunál Distritál Baucau kondena arguidu LP ho pena prizaun fulan 6 suspende ba tinan 1 tanba komete krime ofensa ba integridade fízika simples hasoru nia feen. Kazu ne'e akontese iha 16 Janeiru 2013 iha Sub-Distritu Uatulari, Distritu Viqueque

Tribunál prova katak arguidu no lezada diskuti malu tanba lezada sulan karau tarde. Tanba ne'e, arguidu nervozu hodi baku lezada dala ida iha kabas no dala ida iha ulun.

Maske nune'e, tribunál mós konsidera sirkunstánsia antenuantes sira hanesan arguidu foin primeira-ves komete krime, no diak malu ona ho lezada no moris normal hanesan feen no laen.

Bazeia ba faktus hirak ne'e, tribunál kondena arguidu ho pena prizaun fulan 6 suspende ba tinan 1 plus selu kustus judisiál US\$ 10,00.

Antes ne'e ministériu públiku akuza katak iha 16 Jullu 2013, maizumenus iha tuku 16:00 lorokraik, arguidu foti ai ida hodi baku lezada nia ulun dala rua, dala hat iha lezada nia kabas karuk no dala rua iha lezada nia ain parte karuk. Kazu ne'e akontese tanba lezada tarde sulan karau iha luhan.

3. Kazu krime ofensa ba integridade fízika simples ho natureza violénsia doméstika – Núc. 0536/13.PDBAU

Kompozisaun tribunál : Singulár
Juis : Dr. Afonso Carmona

Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena pena fulan 6 suspende tinan 1

Iha 18 Agostu 2014, Tribunál Distritál Baucau kondena arguidu RdS ho pena prizaun fulan 6 suspende ba tinan ida tanba kolete krime ofensa ba integridade fízika simples hasoru nia feen. Kazu ne'e akontese iha 22 Outubru 2013 Sub Distritu Ossu, Distritu Viqueque.

Tribunál prova katak arguidu tebe dala ida iha lezada nia kabun no tuku dala rua iha kotuk laran, tanba lezada istoria-malu ho arguidu nia inan. Maske nune'e tribunál mós konsidera katak arguidu diak malu ona ho lezada.

Bazeia ba faktu hira ne'ebé produz durante julgamentu, tribunál kondena arguidu ho pena prizaun fulan 6 no suspende ba tinan 1.

Antes ne'e, ministériu públiku akuza katak iha 22 Outubru 2013, maizumenus iha tuku 15:30 lorokraik, arguidu tebe dala ida iha lezada nia kabun no tebe dala ida iha kidan. Arguidu kontinua tuku dala rua iha kotuk laran. Kazu ne'e akontese tanba lezada istori malu ho arguidu nia inan.

4. Kazu krime ofensa ba integridade fízika simples ho natureza violénsia doméstika – Núc. 0437/12.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena pena multa US\$30,00

Iha 18 Agostu 2014, Tribunál Distritál Baucau prezide julgamentu leitura sentensa ba kazu ofensa ba integridade fízika simples ne'ebé involve arguidu VR hasoru nia feen. Kazu ne'e akontese iha 19 Setembru 2012 Ossu, Distritu Viqueque.

Tribunál prova katak arguidu tuku dala ida iha lezada nia oin, tuku dala ida ibun to'o lezada sofre kanek iha ibun.

Bazeia ba faktu sira ne'ebé produz durante julgamentu tribunál konklui prosesu ne'e no kondena arguidu ho pena multa multa US\$30,00 ne'ebé sei selu US\$0,50 durante loran 60 nia laran. Tribunál mós aplika pena alternativa durante loran 40 iha prizaun se arguidu la selu pena multa refere.

Antes ne'e ministériu públiku akuza katak iha 19 Setembru 2012, maizumenus iha oras tuku 08:30 dader, arguidu ba dada karau atu oho ba sira nia viziñu ne'ebé mate. Iha momento ne'eba,

arguidu fila tarde no lezada tolok arguidu. Tanba ne'e mak arguidu hirus no tuku dala 1 iha ren toos, no dala 1 iha ibun to'o ran suli.

5. Kazu krime ofensa ba integridade fízika simples ho natureza violénsia doméstika – Núc. 0467/11.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena pena prizaun tinan 1 suspende tinan 2

Iha 18 Agostu 2014, Tribunál Distritál Baucau kondena arguidu AdCG ho pena prizaun tinan 1 suspende ba tinan 2 tanba provadu komete krime ofensa ba integridade fízika simples hasoru nia feen. Kazu akontese iha 30 Dezembru 2011, iha Karaubalu, Distritu Viqueque.

Tribunál prova katak iha 30 Dezembru 2011, arguidu diskunfia lezada iha relasaun ho mane seluk. Arguidu tolok lezada no tuku dala rua iha lezada nia liman, tuku dala ida iha kanuruk, dala hat iha tilun no tebe dala ida iha kidan.

Bazeia ba provas hirak ne'e tribunál konklui prosesu ne'e no kondena arguidu ho pena prizaun tinan 1 suspende ba tinan 2. Tribunál mós kondea kustus judisiál US\$40,00 ba arguidu.

Antes ne'e ministériu públiku akuza katak iha 30 Dezembru 2011, maizumenus iha tuku 08:00 dader, arguidu fila hosi Buanurak, no tolok no tuku lezada dala hat iha tilun, dala rua iha liman, tuku dala ida iha kanuruk no tebe dala ida iha lezada nia kidan. Kazu ne'e akontese tanba lezada deskonfia arguidu ba fetu seluk.

6. Kazu krimi ofensa ba integridade fízika simplés ho natureza violénsia doméstika – Núc. 0310/12.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena pena multa US\$160,00

Iha 18 Agostu 2014, Tribunál Distritál Baucau hala'o julgamentu ho agenda leitura sentensa ba kazu krime ofensa ba integridade fízika simples ne'ebé involve arguidu FdC (nu'udar membru PNTL) hasoru nia feen. Kazu ne'e akontese iha 19 Jullu 2012, iha Sub-Distritu Ossu, Distritu Viqueque.

Tribunál prova katak arguidu aperta lezada nia kakorok no dudu lezada to'o lezada sofre bubu iha kakorok. Tribunál mós prova katak arguidu no lezada agora daudaun separadu ona.

Bazeia ba faktu sira ne'ebé produz durante julgamentu, tribunál konklui prosesu ne'e no kondena arguidu ho pena multa US\$160,00 ne'ebé sei selu US\$1,00 kada loron durante loron 160 pluz kustu judisial US\$10,00. Tribunál aplika mós pena alternativa arguidu durante loron 105 iha prizaun kuandu arguidu la selu pena multa refere.

Antes ne'e ministériu públiku akuza katak iha loron 19 Jullu 2012, tuku 06:00 dader, arguidu aperta makas lezada nia kakorok no dudu lezada no rezulta lezada sofre bubu iha kakorok.

Kazu ne'e akontese tanba lezada ba buka arguidu no toman arguidu iha fetu ida nia uma. Momentu ne'eba arguidu la toba iha uma durante kalan rua ona.

7. Kazu krimi ofensa ba integridade fízika simples ho natureza violénsia doméstika – Núc. 0456/13.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Pascasio de Rosa Alves
Defeza : Dr. Jonas Henrique da Costa
Konkluzau : Kondena ho pena multa US\$90,00

Iha 18 Agostu 2014, Tribunál Distritál Baucau prezide julgamentu leitura sentensa ba krime ofensa ba integridade fízika simples ne'ebé komete hosi arguidu JB hasoru nia feen. Kazu ne'e akontese iha 24 Jullu 2013 Karaubalu, Distritu Viqueque.

Antes ne'e ministériu públiku akuza, katak iha 24 Jullu 2013, maizumenus iha oras tuku 15:00 lorokraik, arguidu, lezada no lezada nia família tu'ur hamutuk hodi rezolve problema kona-ba arguidu ne'ebé dekonfia mane seluk tula lezada. Iha momentu ne'eba arguidu nervozu hodi basa lezada dala ida to'o monu ba rai.

Tribunál prova katak arguidu basa dala ida iha lezada nia ulun to'o monu ba rai. Tanba ne'e tribunál kondena arguidu ho pena multa US\$90,00 ne'ebé sei selu US\$1,00 kada loron durante loron 90. Tribunál aplika mós pena alternativa durante loron 60 iha prizaun kuandu arguidu la selu pena multa refere.

8. Kazu krime ofensa ba integridade fízika simples - Núc. 0080/14.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Luis Hernani Rangel da Cruz
Defeza : Dr. Juvinal Yanes
Konkluzau : Omologa prosesu no absolve arguidu

Iha 19 Agostu 2014, Tribunál Distritál Baucau hala'o tentativa konsiliaun ba kazu ofensa ba integridade física simples ne'ebé komete hosi arguidu Roque Paixao da Silva no Petrus Pereira hasoru Joana Pinto Soares. Kazu ne'e akontese iha 31 Janeiro 2014, iha Buruma, Distritu Baucau.

Liu-husi tentativa konsiliaun ne'e, lezada deklara katak nia perdua arguidu sira no ho iniciativa rasik deklara katak nia hakarak dada fila fali kazu ne'e. Arguidu sira mós deklara ba tribunál katak sira prontu rekopera fila fali lezada dignidade hanesan fetu no husu deskulpa. Arguidu sira konkorda atu hadia lezada nia naran diak liuhosi fo fahi ida no tais fetu ida ba lezada.

Ministériu Públiku akuza katak iha 31 Janeiro 2014, arguidu Roque Paixão da Silva basa dala 1 iha lezada nia hasan no arguidu Petrus Pereira buti lezada nia kakorok. Arguidu sira senti aan wainhira lezada tolok lezada nia oan rasik no sira hela besik malu hanesan viziñu.

Bazei ba pedidu hosi lezada no sira nia akordu atu dada fila fali kazu ida ne'e, tribunál omologa prosesu no absolve arguidu sira hosi akuzasaun ministériu públiku.

9. Kazu krime danu agravadu - Nú. Prosesu : 191/Crm.C/2012.TDB

Kompozisaun tribunál : Koletivu
Juis : Dr. Afonso Carmona, Dr.Hugo da Cruz Pui no Dr. Antonio
Fonseca
Ministériu Públiku : Dr. Luis Hernani Rangel da Costa
Defeza : Dr. Juvinal Yanes
Konkluzau : Adia

Iha 19 Agostu 2014, Tribunál Distritál Baucau adia prosesu julgamentu ba kazu krime danu agravadu ne'ebé involve arguidu JC, DG, CdC, PGdR no TMB. Arguidu sira prátika krime ne'e hasoru lezadu MHP no AG (matebian), iha 11 Abril 2011, iha Distritu Baucau.

Prosesu julgamentu ne'e adia tanba lezadu AG mate no parte família seidak apresenta sertidaun mate ba iha tribunál.

Relasiona ho impedimentu ne'e, tribunál decide atu adia fali prosesu ne'e, maibe tribunál seidak marka agenda fiksi julgamentu ba kazu ne'e.

10. Kazu krime ofensa ba integridade física simples ho natureza violénsia doméstika- Núc. 0508/12.PDBAU

Kompozisaun tribunál : Singulár
Juis : Dr. Jose Gonçalves
Ministériu Públiku : Dr. Pascasio de Rosa Alves

Defeza : Dr. Juvinal Yanes
Konkluzau : Adia

Tuir-mai, iha 19 Agostu 2014, Tribunál Distritál Baucau mós kontinua adia prosesu julgamentu ba kazu krime ofensa ba integridade fízika simples ne'ebé inolve arguidu RRL hasoru nia feen. Kazu ne'e akontese iha 09 Outubru 2012 iha Distritu Baucau.

Prosesu julgamentu ne'e adia tanba juis titular ba kazu ne'e urjenti partisipa enkontru ida iha Dili no tribunál seidauk konsege marka agenda julgamentu foun ba kazu ne'e.

11. Kazu krime ofensa ba integridade fízika simples ho natureza violénsia doméstika- Núc. 0513/13.PDBAU

Kompozisaun tribunál : Singulár
Juis : Dr. Jose Gonçalves
Ministériu Públiku : Dr. Pascasio de Rosa Alves
Defeza : Dr. Juvinal Yanes
Konkluzau : Adia

Iha loron hanesan, 19 Agostu 2014, Tribunál Distritál Baucau kontinua adia prosesu julgamentu ba kazu krime ofensa ba integridade fízika simples ne'ebé involve arguidu GP hasoru nia feen ne'ebé akontese iha 20 Marsu 2013, iha Distritu Viqueque.

Kazu ne'e mós adia tanba motivasaun hanesan katak juis titulár ba kazu ne'e urjenti partisipa iha enkontru ida iha Dili no tribunál mós seidauk konsege marka agenda fiksi ba julgamentu relasiona ho kazu ne'e.

12. Kazu krime omisídiu neglijente - Nuc. 0285/13.PDBAU

Kompozisaun Tribunál : Singulár
Juis : Dr. Antonio Fonseca
Ministériu Públiku : Dr. Luis Hernani Rangel da Cruz
Defeza : Dr. Juvinal Yanes
Konkluzau : Sei kontinua prosesu

Iha 21 Agostu 2014, Tribunál Distritál Baucau hala'o prosesu julgamentu ba kazu krime omisídiu neglijente ne'ebé involve arguidu Nogerio Marcal de Jesus (funsionáriu CNE) hasoru Rofina de Sousa (matebian). Kazu ne'e akontese iha 13 Jullu 2013, iha Distritu Manatutu.

Ministériu Públiku akuza arguidu katak iha 13 Jullu 2013, maizumenus iha oras tuku 07:00 dader lezada sae bis SUN FLOWER hosi Venilale mai Dili atu fa'an modo. Iha area Be-Hali, Distritu

Manatuto bis refere para hodi deskansa. Momentu bis para, lezada tun hosi bis no liuhosi kareta kotuk korta ba estrada sorin maibé iha momentu lezada korta dalan derepente arguidu ho motor Vixon ida ho Nu. Matrikula 3939 mai husi diresaun Dili ho velocidade makas, la fo atensaun no la konsege trava no soke lezada.

Asidente ne'e rezulta lezada sofre ulun nakfera. Lezada konsege lori ba hala'o tratamentu iha Hospital Nasionál Guido Valadares (HNGV), maibé la konsege salva lezada nia vida.

Relasiona ho aktu ne'e, ministériu públiku akuza arguidu kontra artigu 140 Kódigu Penál kona-ba omisídiu negligente.

Iha prosesu julgamentu arguidu deklara katak iha momentu ne'eba nia tula nia primu ida husi Dili atu ba Venilale. Iha área dalan Be-Hali, maizumenus iha metru 250, arguidu hare ona bis ida para iha parte karuk. Tanba ne'e arguidu hatun velisidade ba iha 40 kilometru/oras, maibé derepente lezada mosu mai husi bis kotuk la'o tama ba iha estrada klaran. Arguidu hare ona lezada hosi maizumenus metru hat maibé arguidu la konsege trava no soke lezada.

Testemuña TXP nu'udar lezada nia laen depoimentu katak nia rona informasaun via telefone hosi nia oan ne'ebé eskola iha Dili katak lezada hetan soke no lori ona ba iha ospital. Testemuña ne'e hatutan katak iha seremonia funeral ba matebian, arguidu fo osan US\$4000,00, ofere se karau rua, kafe nomos masin midar.

Testemuña CMdS nu'udar arguidu nia primu ne'ebé arguidu tula depoimentu katak iha momentu ne'eba nia hare duni bis ida para hela. Wainhira sira atu besik ona bis refere derepente, sira soke lezada no sira nain rua mos monu. Alende ne'e, testemunha mós reforsa tan katak arguidu ajuda família matebian ho karau rua, bibi rua no osan US\$4000,00 inklui kafe, masin midar no fos.

Testemuña ONP hanesan sofer ba bis ne'ebé lezada sae depoimentu katak nia la hare motor hosi oin tanba prekupa hela ho kareta atu aranka maibé derepente nia rona tarutu no hare motor ne'ebé arguidu lori soke tiha ona lezada.

Depoimentus hosi arguidu no testemuña sira hamosu duvidas ba tribunál tanba deklarasaun no depoimentus la hanesan. Hatan ba duvidas ne'e, tribunál decide atu halo inspesaun ba iha fatin akontesimentu ne'ebe marka ba iha 12 Setembru 2014, tuku 11:00 dader.

13. Kazu krime ofensa integridade física simples ho natureza violéncia doméstika – Nuc. 0567/13.PDBAU

Komposizaun tribunál	: Singulár
Juis	: Dr. Hugo da Cruz Pui
Ministériu Públiku	: Dr. Luis Hernani Rangel da Cruz
Defeza	: Dra. Casilda Sebastiana Ximenes

Konkluzauun : Sei kontinua prosesu

Iha 21 Agostu 2014, Tribunál Distritál Baucau hala'o prosesu julgamentu ba kazu ofensa ba integridade fízika simples ne'ebé involve arguidu JLdSB hasoru nia oan. Kazu ne'e akontese iha 20 Novembru 2013, iha Sub-distritu Baucau, Distritu Baucau.

Ministeriu Publiku akuza katak iha 20 Novembru 2013, maizumenus iha oras tuku 07:00 kalan, arguidu han no husu ba lezada atu aumenta modo ba arguidu maibé lazada lakohi tanba ne'e arguidu nervozu no foti kadeira masa ida baku dala ida iha lezada nia ulun to'o sofre kanek.

Relasiona ho aktu ne'e, ministériu públiku akuza arguidu kontra artigu artigu 145 Kódigu Penál kona-ba ofensa ba integridade fízika simples konjugadu ho artigu 35 Lei Kontra Violénsia Doméstika.

Iha prosesu julgamentu arguidu CX konfesa no rekoñese katak nia halo duni krime ne'ebé ministériu públiku akuza hasoru nia no nia arrepende ninia hahalok.

Iha alegasaun finál, ministériu públiku husu ba tribunál atu kondena arguidu ho pena prizaun fulan tolu (6) no suspende tiha pena ne'e ba tinan (1).

Iha parte seluk, iha defeza ninia alegasaun finál husu ba tribunál kondena arguidu ho pena multa tuir arguidu nia kapasidade.

Depois rona tiha alegasaun sira ne'e, tribunál marka fila fali julgamentu kontinuasaun ba iha 04 Setembru 2014, tuku 14:00 lorokraik ho agenda desizaun finál.

14. Kazu krime hasoru flora no fauna - Nuc. 0046/12.PDBAU

Kompozisaun tribunál : Singulár
Juis : Dr. Afonso Carmona
Ministériu Públiku : Dr. Luis Hernani Rangel da Cruz
Defeza : Dr. Americo Luis Freitas Belo
Konkluzauun : Adia

Iha 21 Agostu 2014, Tribunál Distritál Baucau adia prosesu julgamentu ba kazu krime hasoru flora no fauna ne'ebé involve arguidu JAB, LXX, JFB no JSS. Kazu ne'e akontese iha 21 Janeiru 2012, iha Distritu Baucau.

Kazu ne'e adia tanba arguidu nain ida no testemuña nain rua la marka prezensa iha tribunál maske tribunál notifika ona. Tanba ne'e, tribunál adia fali prosesu julgamentu ne'e ba iha 14 Outubru 2014, tuku 14:00 lorokraik.

15. Kazu krime omisídiu agravadu ho natureza violénsia doméstika – Núc. 0041/13.PDBAU

Kompozisaun tribunál : Koletivu
Juis : Dr. Antonio Fonseca, Dr. Afonso Carmona no Dr. Hugo da Cruz Pui
Ministériu Públiku : Dr. Luis Hernani Rangel da Cruz
Defeza : Dr. Juvinal Yanes
Konkluzau : Kondena pena prizaun tinan 16 fulan 6

Iha 21 Agostu 2014, Tribunál Distritál Baucau hala'o prosesu julgamentu ho agenda leitura akordaun ba kazu krime omisídiu agravadu ne'ebé komete hosi arguidu JXD hasoru nia feen. Kazu ne'e akontese iha 01 janeiru 2013, iha Sub-Distritu Laga, Distritu Baucau.

Tribunál prova katak arguidu no lezada diskuti malu kona-ba arguidu atu lori nia oan ba arguidu nia uma. Momentu arguidu kous oan no atu hakat ba, lezada dehan ba arguidu katak labarik seidauk haris. Arguidu hatun labarik, hasai tudik ne'ebé sikat iha kanotak hakat ba lezada no sona lezada nia kabun to'o lezada nia tee-oan sai. Arguidu kontinua sona dala rua iha lezada nia iha hirus matan karuk no loos.

Depoisde akontesementu konsege lori lezada ba iha ospital maibé la bele salva lezada nia vida, lezada mate kedas iha lora ne'e. Faktu hirak ne'e hetan konfirmasaun ho depoimentu hosi testemuña MD nu'udar lezada nia inan ne'ebé hare ho matan bainhira kazu ne'e akontese.

Ministériu Públiku akuza arguidu kontra artigu 138 Kódigu Penál Kona-ba omisídiu simples no artigu 139 Kódigu Penál kona-ba omisídiu agravadu konjugadu ho artigu 35 Lei Kontra Violénsia Doméstika.

Bazei aba faktu sira ne'ebé produz durante julgamentu, tribunál konklui prosesu ne'e no kondena arguidu ho pena prizaun tinan 16 fulan 6.

16. Kazu krime violasaun seksuál - Nú. Prosesu : 367/Crm.C/2013.TDB

Kompozisaun tribunál : Koletivu
Juis : Dr. Jose Gonçalves
Ministériu Públiku : Dr. Luis Hernani Rangel da Cruz
Defeza : Dr. Juvinal Yanes
Konkluzau : Adia

Iha 22 Agostu 2014, Tribunál Distritál Baucau adia prosesu julgamentu ba kazu krime violasaun seksuál ne'ebé involve arguidu JS hasoru CP nu'udar lezada. Kazu ne'e akontese iha 21 Novembru 2013 iha Laklubar, Distritu Manatutu.

Prosesu julgamentu ne'e adia tanba lezada iha moras hela. Tanba ne'e, tribunál marka fila fali prosesu julgamentu ba iha 05 Novembru 2014, tuku 14:30 lorokraik.

17. Kazu krime danu simples – Nuc : 0422/12.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Luis Hernani Rangel da Cruz
Defeza : Dr. Casilda Sebastiana Ximenes
Konkluzau : Sei kontinua prosesu

Iha 22 Agostu 2014, Tribunál Distritál Baucau hala'o julgamentu ba kazu krime danu simples ne'ebé involve arguida JB hasoru lezadu AdC. Kazu ne'e akontese iha 07 Setembru 2012, iha Distritu Lautem.

Ministériu Públiku akuza katak iha 07 Setembru 2012, maizumenus iha oras tuku 12:00 kalan, arguida foti dima ida tuda mate lezadu nia karau ne'ebé tama iha arguida nia toos. Aktus ne'e prejudika lezadu lakon osan US\$600,00.

Relasiona ho aktu ne'e, ministériu públiku akuza arguida kontra artigu 258 Kódigu Penál kona-ba danu simples.

Iha prosesu julgamentu arguida konfesa katak nia mak oho duni karau ne'e tanba antes ne'e arguida lamenta bebeik ona kona-ba karau ne'ebé sempre tama beibeik sira nia toos hodi estraga sasan iha toos laran. Entre arguida no lezadu sira hela iha Suku Lakava, maibe aledea ketaketak. Arguida hosi Aldea Venerava no lezadu hosi Aldea Lakava.

Iha prosesu julgamentu lezadu deklarata katak karau ne'e ninian no tanba karau ne'e iha alin tolu maka karau ne'e nia folin US\$600,00.

Testemuña LS nu'udar arguidu nia xefe aledea depoimentu katak karau ne'e lezadu nian no durante ne'e nunca sulan ba luhan. Antes ne'e mós arguida informa ona ba nia kona-ba lezadu nia karau ne'ebé tama beibeik ba halo estraga arguida nia toos. Tuir xefe aldeia karau ne'ebé alin rua baibain nia folin US\$250,00.

Testemuña DdC nu'udar lezada nia xefe aledeia deklarata katak karau ne'e lezadu nia tanba lezadu mak hein, karau ne'e alin ida baibain ho folin US\$300,00.

Iha alegasaun finál, ministériu públiku husu ba tribunál atu kondena arguida ho pena prizaun fulan nen (6) no suspende tiha pena ne'e ba tinan (1) kondena mos arguida selu indeminizasaun sivil ba lezadu US\$600,00.

Iha parte seluk, defeza hosi ba tribunál atu kondena arguidu ho pena adekuada no absolve arguidu husi indeminizasaun sivil, tanba arguidu arepende nia hahalok, la iha antisidente kriminal

Depois rona tiha deklarasaun hodi tribunál marka fali prosesu leitura sentesa hala'o iha 11 Novembru 2014, tuku 14.00.

18. Kazu krime ofensa ba integridade física simples ho natureza violência doméstica- Nuc. 0044/14.PDBAU

Kompozisaun tribunál 1 : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alve
Defeza : Dr. Juvinal Yanes
Konkluzau : Kondena ho pena multa US\$45,00

Iha 25 Agostu 2014, Tribunál Distritál Baucau liuhosi tribunál movel iha Eskuadra PNTL Sub-Distritu Viqueque, prezide julgamentu ba kazu krime ofensa ba integridade física simples ne'ebé involve arguidu SSdS hasoru nia feen. Kazu ne'e akontese iha 26 Dezembru 2013, iha Ossu, Distritu Viqueque.

Ministériu Públiku akuza katak iha 26 Dezembru 2013, maizumenus iha oras tuku 15:00 lorokraik, antes arguidu sai husi uma ba iha mate uma (viziñu), arguidu xavi metin tiha lezada iha uma laran. Tanba ne'e lezada labele sai hosi uma laran inklui labele ba soe be iha liur.

Iha momentu ne'eba lezada husu ajuda ba AM ne'ebé hanesan lezada nia oan-hakiak hodi loke odamatan. Arguidu fila husi mate uma hare odamatan nakloke nune'e halo arguidu nervozu hodi tuku dala rua iha lezada nia kabun sorin karuk no tebe dala barak iha lezada nia kotuk laran no oin. Arguidu kontinua rasta lezada nia fuk no riba ba kama laran nomos buti lezada nia kakorok.

Relasiona ho aktu ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade física simples konjugadu ho artigu 35 Lei Kontra Violência Doméstica.

Iha prosesu julgamentu arguidu konfesa, rekoñese ba faktus sira husi akuzasaun ministériu públiku. Arguidu haktuir katak nia xavi metin lezada iha uma laran tanba lezada lakohi atu ba uma mate. Ne'e mak halo arguidu nervozu no komete krime hasoru lezada.

Entretantu lezada deklara katak arguidu tuku dala rua iha lezada nia kabun sorin karuk, tebe dala rua iha lezada nia kotuk laran no basa dala ida iha lezada nia oin. Arguidu mós rasta lezada nia fuk no riba ba kama laran nomos buti kakorok.

Iha alegasaun finál, Ministériu Públiku husu ba tribunál kondena arguidu ho pena prizaun fulan 6 no suspende ba tinan 1.

Iha parte seluk, defeza husu ba tribunál atu aplika pena admoestasaun ba arguidu tanba arguidu konfesa faktus hosi akuzasaun ministériu públiku.

Depois rona tiha alegasaun finál, tribunál suspende tiha audiensia julgamentu durante menu 15 hodi fo tempu ba juis prepara sentensa ba kazu ida ne'e.

Depois suspende durante menu 15, tribunál konklui prosesu ne'e no kondena arguidu ho pena multa US\$45,00 ne'ebé sei selu US\$0,50 kada loron durante loron 90. Tribunál aplika mós pena alternativa durante loron 60 iha prizaun se arguidu la selu pena multa refere.

19. Kazu krime ofensa ba integridade física simples ho natureza violência doméstica- Nuc. 0040/14.PDBAU

Kompozisaun tribunál	: Singulár
Juis	: Dr. Hugo da Cruz Pui
Ministériu Públiku	: Dr. Pascasio de Rosa Alves
Defeza	: Dr. Juvinal Yanes
Konkluzau	: Kondena ho pena multa US\$45,00

Iha 25 Agostu 2014, Tribunál Distritál Baucau liuhosi tribunál movel iha Eskuadra PNTL Sub-involve arguidu AF hasoru nia feen. Kazu ne'e akontese iha 30 Novembru 2013, iha Uatucarbau, Viqueque.

Ministériu públiku akuza katak iha 30 Novembru 2013, maizumenus iha oras tuku 10:00 kalan, arguidu loke gravador ho volume makas tanba ne'e lezada senti moe no husu atu arguidu hatun volume. Arguidu nervozu hodi tebe dala ida iha lezada nia kotuk laran to'o lezada monu ba rai no kontinua buti lezada nia kakorok.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simplés konjugadu ho artigu 35 Lei Kontra Violénsia Doméstika.

Iha prosesu julgamentu arguidu konfesa, rekoñese no deklara katak nia arrepende ba ninia hahalok ne'ebé nia komete hasoru nia feen.

Iha alegasaun finál, ministériu públiku husu ba tribunál kondena arguidu ho pena ne'ebé justu ba arguidu. Iha parte seluk, defeza husu ba tribunál aplika pena ne'ebé adekua tanba arguidu konfesa faktus ne'ebé ministériu públiku akuza hasoru nia.

Depois rona tiha alegasaun finál, tribunál suspende tiha audiensia julgamentu durante minutu 15 hodi juis prepara sentensa ba kazu ida ne'e.

Depois suspende tiha prosesu ne'e no avalia faktu sira ne'ebé priduz durante julgamentu, tribunál konklui prosesu ne'e no kondena arguidu ho pena multa US\$90,00 ne'ebé sei selu US\$1,00 kada loraun durante loraun 90, pluz kustu judisiál US\$10,00. Tribunál aplika mós pena alternativa durante loraun 60 atu arguidu kumpri iha prizaun kuandu arguidu la selu pena multa refere.

20. Kazu krime ofensa ba integridade física simples ho natureza violência doméstica- Nuc. 0026/14.PDBAU

Kompozisaun tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Juvinal Yanes
Konkluzau : Absolve

Iha 26 Agostu 2014, Tribunál Distritál Baucau liuhosi tribunál movel iha Eskuadra PNTL Sub-Distritu Viqueque, prezide julgamentu ba kazu krime ofensa ba integridade física simples ne'ebé involve arguidu GRGA nu'udar professor iha Ensino Báziku hasoru nia feen (nu'udar membru PNTL). Kazu ne'e akontese iha 02 Outubru 2013, iha Caraubalu, Distritu Viqueque.

Ministériu Públiku akuza katak iha 02 Outubru 2013, maizumenus iha oras tuku 10:15 kalan, wainhira arguidu ho lezada fila hosi julgamentu iha Tribunál Distrital Baucau relasiona ho kazu violência doméstica seluk ne'ebé arguidu komete hasoru lezada

Iha dalan arguidu tolok lezada no hateten katak halo moe arguidu tanba lori kazu ne'e to'o tribunál. Iha uma, arguidu tuku dala barak iha lezada nia liman los kaer lezada nia fuk no koko atu dada brinkus iha lezada nia tilun.

Relasiona ho aktu ne'e, Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjugadu ho artigu 35 Lei Kontra Violência Doméstica.

Iha prosesu julgamentu arguidu rekuza akuzasaun hosi ministériu públiku katak nia la tolok no la baku lezada. Arguidu hatutan katak iha 02 Outubru 2013, depois fila hosi tribunál, sira toba iha família iha Baucau. Arguidu hakfodak wainhira hetan notifikasaun hosi ministériu públiku

relasiona ho kazu ida ne'e. Tuir arguidu tuir lolos lezada iha problema ho arguidu nia oan la'os ho arguidu.

Entretantu lezada mantein akuzasaun katak arguidu baku duni nia hanesan haktuir iha akuzasaun ministériu públiku.

Iha alegasaun finál, ministériu públiku husu ba tribunál atu aplika pena ne'ebe adekuaudu ba arguidu. ha parte seluk, defeza husu ba tribunál absolve arguidu husi akuzasaun hosi Ministeriu Publiku.

Bazei aba faktu sira ne'ebé produz iha julgamentu sira antes, iha 28 Agostu 2014, tribunál konklui prosesu ne'e no absolve arguidu hosi akuzasaun ministériu públiku tanba provas la sufsiente.

21. Kazu krime ofensa ba integridade fízika simples ho natureza violénsia doméstika- Nuc. 0543/14.PDBAU

Kompozisaun tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Juvinal Yanes
Konkluzau : Kondena ho pena admoestasaun

Iha 25 Agostu 2014, Tribunál Distritál Baucau liuhosi tribunál movel iha Eskuadra PNTL Sub-Distritu Viqueque, prezide julgamentu ba kazu krime ofensa ba integridade fízika simples ne'ebé involve arguidu HdCP hasoru CS nu'udar nia feen, JdC nu'udar arguidu nia feton no MP nu'udar arguidu nia inan. Kazu ne'e akontese iha 03 Novembru 2013, iha Uatucarbau, Distritu Viqueque.

Ministériu Públiku akuza katak iha 03 Novembru 2013, iha oras tuku 17:00 lorokraik, arguidu nia feton no inan baku lezada. Tanba ne'e, arguidu HdPC nervozu hodi basa dala rua hasoru nia inan no feton inklui lezada no kada ema hetan basa hosi arguidu dala rua.

Relasiona ho aktu ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples konjugadu ho artigu 35 Lei Kontra Violénsia Doméstika.

Kazu ofensa ba integridade fízika simples ne'ebé hasoru arguidu nia inan no feton, tribunál omologa no absolve arguidu bazeia akordu antes entre parte sira. Tanba lezada sira fo perdua ba arguidu no desiste tiha keixa.

Maske nune'e, tribunál kontinua hala'o prosesu julgamentu ba kazu ofensa simples ne'ebé komete hosi arguidu hasoru nia feen.

Iha prosesu julgamentu arguidu HdPC konfesa, rekoñese no deklarata katak nia arrepende ba ninia hahalok.

Iha alegasaun finál, Ministériu Públiku husu ba tribunál kondena arguidu ho pena admoestasaun. Iha parte seluk, defeza husu ba tribunál aplika pena admoestasaun ba arguidu tanba arguidu konfesa parsialmente faktu ba tribunál.

Depois rona alegasaun finál hosi ministériu públiku no defeza, tribunál suspende julgamentu durante minutu 15.

Depois minutu 15, tribunál halo fila fali audiensia julgamentu hodi anunsia desizaun finál. Bazeia ba faktu sira ne'ebé produz durante julgamentu, tribunál konklui prosesu ne'e no kondena arguidu ho pena admoestasaun.

22. Kazu krime ofensa ba integridade física simples - Núc. 0025/14.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa alves
Defeza : Dr. Juvinal Yanes
Konkluzau : Omologa

Iha 27 Agostu 2014, Tribunál Distritál Baucau hala'o tentativa konsiliaun ba arguida Natalia Soares Alves nu'udar membru PNTL ne'ebé komete krime ofensa ba integridade física simples hasoru Joanina Lino nu'udar membru PNTL. Kazu ne'e akontese iha 29 Novembru 2013, iha Distritu Viqueque.

Ministériu Públiku akuza katak arguidu komete krime ne'e hasoru lezada relasiona ho prosesu kazu ne'ebé lakon iha PNTL Sub-distritu Viqueque. Arguida no lezada dun malu kona-ba se los mak simu kazu refere no arguida tebe dala ida iha lezada nia ain.

Ministériu Públiku akuza arguidu sira kontra artigu 145 Kódigu Penál kona-ba krime ofensa ba integridade física simples.

Lihosi tentativa konsiliaun ne'e, lezada deklarata katak nia perdua arguida tanba sira servisu hamutuk instituisaun PNTL. Aleinde ne'e, iha tribunál nia oin arguida husu deskulpa ba lezada.

Depois arguida no lezada sira simu malu no fo perdua ba malu, ikus-mai tribunál konklui prosesu ne'e no omologa arguida hosi akuzasaun ministériu públiku nian.

23. Kazu krime ofensa ba integridade física simples - Núc. 0431/14.PDBAU

Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Juvinal Yanes
Konkluzau : Omologa

Iha 27 Agostu 2014, Tribunál Distritál Baucau hala'o tentativa konsiliaun ba arguidu Alfredo Soares ne'ebé komete krime ofensa ba integridade fízika simples hasoru lezadu Francisco Pinto. Kazu ne'e akontese iha 20 Agostu 2012, iha Distritu Viqueque.

Ministériu Públiku akuza katak arguidu tuku dala ida iha lezadu nia rentos, dala ida iha inus no dala ida iha hirus matan. Kazu ne'e akontese tanba arguidu duun lezadu mak oho nia aman iha tempu Indonezia. Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples.

Liuhosi tentativa konsiliaun ne'e, lezadu fo perdua arguidu tanba sira sei iha relasaun família no hela besik malu ka viziñu. Aleinde ne'e, iha tribunál nia oin, arguidu husu deskulpa ba lezada no promete sei la repete hahalok hanesan iha futuru.

Depois arguidu no lezadu sira simu malu no fo perdua ba malu, ikus-mai tribunál konklui prosesu ne'e no absolve arguidu hosi akuzasaun ministériu públiku.

24. Kazu krime ofensa ba integridade fízika simples ho natureza violénsia doméstika- Nuc. 0861/14.PDBAU

Kompozisaun tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Juvinal Yanes
Konkluzau : Kondena ho pena multa US\$60,00

Iha 28 Agostu 2014, Tribunál Distritál Baucau liuhosi julga movel iha Eskuadra PNTL Sub-Distritu Viqueque, prezide julgamentu sumariu ba kazu krime ofensa ba integridade fízika simples ne'ebé involve arguidu MR hasoru nia feen. Kazu ne'e akontese iha 27 Agostu 2014, iha Suku Carabalu, Distritu Viqueque.

Ministériu Públiku akuza katak iha 27 Agostu 2014, maizumenus iha tuku 07:25 dader depois matabisu lezada husu arguidu atu hare labarik tanba lezada atu ba kuru bee. Maibé arguidu lakohi no tuku dala hitu iha lezada nia kotuk laran no basa dala rua iha lezada nia hasan karuk.

Depois, arguidu kontinua rasta lezada nia fu'uk no dada tama ba iha kuartu laran. Iha kuartu laran arguidu foti fiu elektrisidade ida baku dala rua iha lezada nia isin.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa, rekoñese no deklara katak nia arrepende ninia hahalok hasoru lezada ne'ebé nu'udar nia feen.

Lezada deklara katak dader lezada husu sira nain rua tua ba kuru bee, maibe arguidu la-kohi, no derepente arguidu tuku ni maiuzmentus dala 7 iha kotuk laran, basa dala 2 iha hasan parte karuk, rasta lezada nia fuuk dada tama ba kuartu laran foti fiu elektrisidade nia baku dala 2 iha isin.

Testamunha AR nu'udar arguidu nia feton depoimentu katak nia rona ema hakilar no la hare ho matan akontesimentu.

Iha alegasaun finál, Ministériu Públiku husu ba tribunál kondena arguidu ho pena prizaun tinan 1 no suspende ba tinan tinan 1. Iha parte seluk, defeza husu ba tribunál aplika pena admoestasaun ba arguidu tanba arguidu konfesa parsialmente faktu ba tribunál.

Depois rona tiha alegasaun finál hosi ministériu públiku no defeza, tribunál suspende audiensia julgamentu ba minutu 15 nia laran atu nune'e juis bele prepara sentensa.

Depoisde suspende minutu 15, tribunál kontinua halo audiensia hodi lee desizaun finál. Tribunál kondena arguidu ho pena multa US\$60,00 ne'ebé ei selu kada loron US\$0,50 durante loron US\$120,00. Tribunál aplika mós pena alternativa durante loron 80 iha prizaun kuandu arguidu la selu pena multa refere.

25. Kazu krime ofensa ba integridade fízika simples ho natureza violénsia doméstika- Nuc. 0135/14.PDBAU

Kompozisaun tribunál : Singulár
Juis : Dr. Hugo da Cruz Pui
Ministériu Públiku : Dr. Pascasio de Rosa Alves
Defeza : Dr. Juvinal Yanes
Konkluzau : Kondena ho pena multa US\$60,00

Iha 28 Agostu 2014, Tribunál Distritál Baucau liuhosi tribunál movel iha Eskuadra PNTL Sub-Distritu Viqueque hala'o prosesu julgamentu ba kazu krime ofensa ba integridade fízika simplies

ne'ebé involve arguidu LS hasoru nia feen. Kazu ne'e akontese iha 17 Dezembru 2012, iha Lakluta, Distritu Viqueque.

Ministériu Públiku akuza katak iha 17 Dezembru 2012, maizumenus iha oras tuku 17:40 lorokraik, arguidu ho lezada dsikutí malu kona-ba arguidu deskonfia lezada ba mane seluk. Derepente arguidu dudu lezada ba kuartu laran no tebe dala rua iha lezada nia kidan, buti kakorok. Aktu hirak ne'e rezulta lezada sente tauk.

Relasiona ho aktu ne'e, Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjugadu ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese faktus hotu ne'ebé ministériu públiku akuza ba nia. Arguidu deklara katak nia arrepende ba ninia hahalok.

Iha alegasaun finál, ministériu públiku husu ba tribunál atu kondena arguidu ho pena ne'ebé adekuaudu no justu ba arguidu. Iha parte seluk, defeza husu ba tribunál atu aplika pena admoestasaun ba arguidu tanba konsidera arguidu konfesa parsialmente faktu ba tribunál.

Depois aelgasaun finál, tribunál suspende tiha audiensia julgamentu ba minutu 15 hodi fo tempu ba juis atu formula desizaun.

Depoisde minutu 15, tribunál kontinua halo audiensia hodi lee desizaun finál ba kazu ida ne'e. Tribunál konklui no kondena arguidu ho pena multa US\$30,00 ne'ebé arguidu sei selu kada loron US\$0,50 durante loron US\$60. Tribunál mós aplika pena alternativa durante loron 40 iha prizaun kuandu arguidu la selu pena multa refere.

26. Kazu krime ofensa ba integridade física simples ho natureza violénsia doméstika- Nuc. 0130/14.PDBAU

Kompozisaun tribunál	: Singulár
Juis	: Dr. Hugo da Cruz Pui
Ministériu Públiku	: Dr. Pascasio de Rosa Alves
Defeza	: Dr. Juvinal Yanes
Konkluzau	: Kondena ho pena multa US\$60,00

Iha 29 Agustu 2014, Tribunál Distritál Baucau liuhosi tribunál movel iha Eskuadra PNTL Sub-Distritu Viqueque hala'o julgamentu ba kazu krime ofensa ba integridade física simples ne'ebé involve arguidu CodC nia feen. Kazu ne'e akontese iha 12 Dezembru 2013, Sub-Distritu Ossu, Distritu Viqueque.

Ministériu Públiku akuza katak iha 12 Dezembru 2013, iha tuku 08:38 dader, arguidu ho lezada diskuti malu kona-ba laiha masin midar. Arguidu nervozu hodi tolok lezada no foti ai pedasuk ida baku lezada dala rua iha lezada nia kotuk laran. Arguidu kontinua baku dala ida iha lezada nia ain sorin karuk.

Relasiona ho aktu ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fízika simplis konjuga ho artigu 35 Lei Kontra Violénsia Doméstika.

Iha prosesu julgamentu arguidu konfesa no rekoñese faktus hosi akuzasaun ministériu públiku nian. Arguidu mós deklara katak nia arrepende ba nia hahalok no nia laiha antesidente kriminais.

Iha alegasaun finál, Ministériu Públiku husu ba tribunál kondena arguidu ho pena ne'ebé adekuaudu no justu ba arguidu. Enkuantu defeza husu ba tribunál atu aplika pena admoestasaun ba arguidu tanba arguidu konfesa parsialmente faktu ba tribunál.

Depois rona tiha alegasaun finál, tribunál suspende tiha julgamentu ba minutu 15 hodi fo tempu ba juis prepara desizaun finál ba kazu ne'e.

Depoisde minutu 15, tribunál konklui prosesu ne'e no kondena arguidu ho pena multa US\$60,00 ne'ebé sei selu US\$0,50 durante loron 120. Tribunál mós aplika pena alternativa durante loron 80 iha prizaun kuandu arguidu la selu pena multa refere.

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795

webiste: www.jsmp.tl

facebook www.facebook.com/timorleste.jsmp

twitter: @JSMPtl